

SHWBIZ KLIP

BON DIA



Interes hopi halto p'e prome produccion di e hoben artista Levi Silvanie



Otro siman e produccion titula "Enhanced" di Levi Silvanie lo sali di benta na Corsou y nos ta spera e yega Aruba tambe. E produccion di Levi ta contene 6 disco y entre nan e super hit na Aruba "Djis mi mes" y e ultimo "promocional" di Levi titula "Pret di Paden". Apart di e diferente temanan riba e produccion aki, tur e composicionnan ta di e hoben cantautor bao produccion di Oscar Bor y co-produci p'e propio Levi Silvanie. E parti di Mastering di e produccion tabata den man di Julio Hernandez, mientras cu Selwyn De Windt a haci e arte grafico di e caratula (front cover). Sin cu e produccion ni a subi mercado ainda, ya tin bastante interes tanto na Corsou, Aruba, Bonaire y tambe Hulanda. Den e fin di siman di 17, 18 y 19 December esta otro fin di siman, Levi lo duna un serie di concierto na Corsou, pa cual e expectativanan ta hopi halto mes. Mientras cu preparacion y ensayo nan ta den "full swing", tur e dianoan aki Levi ta bishitando diferente medio di comunicacion, pa papia riba su produccion y concierto nan, mientras cu e acceso pa carchi p'e concierto ta bayendo hopi bon mes ya cu hopi t'e fanaticonan cu kier mira Levi 'live' cu su banda. Pa no papia mes di e tantisimo peticion y reservacion p'e produccion nobo yama "Pret di Paden" cu por cierto a graba un video pa esaki cu lo wordo lansa hunto cu e CD. E video a wordo produci pa 'One Way Melodies', 'Uni Arte' y 'Picsel', clip aki ta cu ta ilustra sigur e letra di e tema "Prèt di Paden" reflehando asina un vibra di un energia



masha positivo, cu hopi expresion di alegria y simpatia. Direccion di e video tabata den man di Sharelly Emanuelson, mientras cu Bart van Tunen a haci direccion di luz, e parti di 'editing' tabata den man di Selwyn de Windt die compania Picsel y tambe Wilko van Oosterhout. Coreccion di color, fotografia y direccion final tabata totalmente den man di Selwyn de Windt. Cu e grupo di hoben talentosonan aki, Levi a sa di ensambla un produccion audiovisual di un nivel halto y un calidad unico, cu sigur lo cay na agrado di su fanaticonan. E video lo wordo pasa pa cuminsa na TeleCuracao cu nos por wak riba cabel aki na Aruba, mientras cu e canal di informacion y showbiz di TDS, "What's

Happening" (Channel 111-Corsou) tambe lo pasa esaki. Esanan cu tin acceso na YouTube por wak esaki online, riba Facebook Levi tin varios pagina, di cual bo por bira un fan di dje y "gusta" e pagina di Levi Silvanie pa mira asina masha hopi potret di dje den pleno gira promocional na Corsou. E produccion nobo di Levi cu ta un talentoso hoben, cu sigur lo bo gusta su musica, letra, melodia, areglo y talento ta cla pa lansa su video, su album y presenta un serie di concierto nan na Corsou. Despues di esey e ta probecha cu e ta na cas p'asina e celebra e dianan di fiesta den seno familiar, prome cu e bolbe Hulanda cu ta programa pa ta e prome dianan di januari 2011.